



Kernsepredigt



Es wirken
mit: SS

Steinbeisser

Klunte
Reil
Bottler
Stolle
Nix 50

Sportverein
Schneekrieg
Kosiner
Stebha

Dings
Drehn
Hagen
Rachtbadern



B O T T L E R

Un jetzt heert ehr noch e G-schischt,
wie mer sich de Finger bricht.
des is eigentlich gar net schwer,
gäiht mer zu de Feierwehr.
Sonntags moijens bei de Ihwung,
bringt der Laumen soi Lait in Schwung.
Schläuch zu rolle und noch mer,
fällt oahm, wenn mer voll is, schwer.
Deshalb is oaner fascht nie dabei,
unsern Bottler vun de Polizei.
E neii Schlauchrollmethode hot er entdeckt,
wobei mer de Mittelfinger in die Kupplung steckt.
Doch beim Ausrolle zeigt sich dann,
daß es der Bottler doch noch net kann.
Er nimmt den Schlauch un rollt'n aus -
des war der Weg ins Krankenhaus.
Der Finger war platt, sogar noch gebroche,
jetzt fällt der Kerl aus, un a noch fer Woche !
Unn deshalb is es a sou kumme :
er hot mim Steppa Kontakt uffgenumme;
do hogge se bei de Wählemer Fraa direkt on de Tränk,
de Steppa un de Bottler uff de Invalidebänk.
Un die Musik speelt mit Hemd und Hose,
der heet besser oaner gebloose !







D O N N E R K E I L

Des noachts um halb elf, mit Stiffel unn Spoarn,
leeft oaner doischs Dorf, is voll bis on die Ohrn.
Im Kittel Patrone, im Kopp e paar Woi,
des werd doch net de Verwalter vum Samer soi ?
Auf des Heimwegs langer Tour,
kimmt er a in die Kurhall, saift e Flasch Whisky pur;
un weil er sou ougibt, kriegt er mit oahm Malheur,
er kreischt die Welt voll : jetzt holl isch's Gewehr.
Er rennt glei hoam und sucht die Granate,
konn se net finne, un verschläigt soi Schwester Renate.
De Ludwisch will helfe, kimmt ins Zimmer gerennt,
un kriegt debei oani uff de Latz gebrennt...
Die Kätha sieht es unn dut rotiern,
sie läßt die Kurgäsch evakuieren!
Damit denne donn uff de Stroß nix passiert,
wern se mit Bleiweste ausstaffiert.
Bei dere grouße Kreischerei,
kimmt a noch die Polizei.
Und wie so oft in letzter Zeit,
schlichte sie beim Keil den Streit.
Sie nemme'n net mit, sie kenne'm nix wolle,
er hot en Ausweis fer Superdolle.
Der Psychater kommt zu dem Entschluß,
daß der Keiler auswandern muß.
für dem Gerhard seine lockere Hand,
brauch mer holt e größeres Land.
Ob mit oder ohne Waffeschoi,
sie weisen noch Australien oi.
Der Keiler is net dumm, verfasst soi Testament,
indem er den Sam als Erbe benennt.
Wenn isch nimmäi konn, kriegt alles der,
Jagtschoi, die Kur unn a es Gewehr !
Unn er Musikante speelt jetzt : dumm, dumm, dumm,
die Kängeruhs renne donn mit Bleiweste rum!



Luftschlacht über Grasellenbach

Om Dienschdoag möijend – es hot uns groad noch g'feelt,
häwwe se iwver Grasembach wia'mol Krieg g'schpeelt.
Fer des Manöver hot mer ougenumme,
daß die Russe vun de Wegschaare kumme,
die Kurgäsch im Wald als Infanterie,
un die Panzer im Tal, des sin em Alfred soi Kieh.
Des Angriffsziel war a glei g'funne :
der Feind erobert de Siegfriedsbrunne !
Die Panzer stäihn jetzt alle in der Wiese,
un häwwe vorher on de Tankstell die Stroß ver...schosse.
Doch doisch Tieffliegerangriffe, knapp iwver de Fische,
dut die Luftwaff' die feindliche Truppe vernichte !
Der Kurgastinfanterie gings schlecht :
mit geplatzttem Trommelfell außer Gefecht.
Die Panzertruppe ergriff die Flucht,
bis Geschten hot der Alfred soi Kieh noch g'sucht.
Denn die Schlacht vum 'Harrebehl'
war fer des Hornvieh doch zuveel !
Jedem Manöverbeobachter machts Spaß,
uff unser Bundeswehr is holt Verlaß !
Un bei sou em klare Manöversieg,
is es klar – mer gewinne de negschte Krieg.
I W W E R H A A B T
Fer e Kneippheilbad g'heert sich's, daß die Wege
NATO – Schützepanzer pflege.
Die Amis häwwe uns im Friejohr geweese :
sie häwwe gonzschäi grouße Scheese;
und sie demonstrieren uns sodann,
was mer mit sou'em Ding alles kaputtmake kann !
Mit Schützepanzer un Kannone,
doun se Feld- un Waldwege net schone,
In Wald rund um die Krumme Tanne,
warn on die Hunnert Panzer g'stoane
Im Handle warn die Grsaembäischer Buhwe uff Zack;
'I bring you e Schnitzel – and you give me your Jack !'
Und die Musik spielt in diesem Sinn,
denne ehrn Handel war de Oanzisch Gewinn !



Schneekrieg

Gras-Ellenbach mein Heimatland,
für Winterspiele Wohl bekannt !
Kaum liegt Schnee unn es werd kolt,
rennt de 'Bifi' doisch de Wold
un mit der grouße Loip'maschien
macht er alle Wege hin !
Die Kette sin grouß - die Kabine ist klein,
wie passt denn da der Adam rein ?
Ich will's eisch glei soache, wie des funktioniert,
die häwwe uff'm Dach en Trichter montiert.
Sou schlubbt er noi ins Fihrerhaus,
unn wenn er drin is, fillt er's völlig aus.
Ausstaije - un des is koan Witz,
konn er nur mim Schleudersitz.

Wenn Schnäi fällt hot äwwer net nur der Adam sein Spaß,
sondern a die ganz Eppelgass :
Denn an oer Kreuzung mit dem geine Licht,
wohne zwö, die verstehn sich nicht.
De Dah macht Worscht, de Onner frißt deshalb blous Kees,
treffe se sisch beim Stammtisch, is e mords Gedees !
Beim 'Hagen'wors - ganz Grasemboch hots g'heert,
sie häwwe sisch oe Krieg erklärt !
'wie Du mir - so ich Dir,
isch bezoahl dem Alfred en Kaschde Bier,
donn schiebt er den Schnäi ,do lecks om Arsch
direkt em Robbel vor die Garasch!!
Der Alfred hot jo e schwarzi Seel,
fer en Kaschde Bier - do freegt mer net veel !
Dem Robbl werds vunn dem Schnäi net bang :
'Isch verbünd misch mim 'Hagen'-mer nemme den Paider in die Zang.'
Sie häwwe schun riesige Schlachtplan gemacht
doch des Problem löbt sich über Nacht :
Es werd warm - sie krieje en Schreck,
denn moiens war der Haufe weg.
Unn wies donn grie werd in de Wiese,
doun se sich a wia grieße,
Doch eigentlich bedauern'ses alle drei,
un suche en Grund fer die negscht Streiterei.
Die Musik speelt - der Robbl is net doof :
'Mit dem Schnäi fidder ich moin Schof !'



STEBBA - FAUST

Jetzt verzähl isch eisch e G-schicht,
wie mer sich soi Boah laischt bricht :
Mittwoch war's - es war schon Uhr,
do macht der Faust noch eine Tour;
'Stebba' dut der Faust sisch soache,
'vor de Singstunn' kennscht de noch e Bier verdroache!'
Er hot noch Zeit, es war noch hell...
'Uff en Schluck zum Hagen schnell!'.
Nooch e paar Bier hot er gedacht :
Jetzt werd noch in die Spritz gemacht.
Beim Hagen haus - die Deer war uff,
do fällt er runner in soim Suff !
Unn in soim griene Sängerdress
haachts'en erscht uff die Trepo - unn dann uff die Bless.
Die stante runner un die For
sagt der Faust dann uff de Streck,
un dreht sich der Stebba um un gähnt :
'im - opf alles klar - nur die Reine; wie gelanmt !'
Dann kreischt der Stebba, es out mords Schrei:
'Isch glaab isch bin g'schenterzt, moi Boah is entzwei.
De Laumen schlaaft'n wie zum Hagen noi,
koa Bier, koan Schnaps, koan Ebbelwoi !
Sie nemmen glei ins Kreuzverhör,
uff jeden Fall ,de Doc muß her !
Der Nitsche säigt : 'Du stinkscht nach Bier!'
Der Steppa säigt : 'Du schtinkscht noch Stall!'
ruckzuck war beim Hagen de gräischde Krawall .
Un aus dem Hagen soinne Beiz,
holle se'n dann ob mim roure Kreiz !
Kaum im Krankehaus geland'
kriegt er glei en Streckverband.
Nur gute Pflege, Bier un Zigarette,
kenne unsern Faust noch rette .
Es is wunderbar im Krankehaus -
dort hält der's 'ne Weile aus .
Mit neuer Kraft un neuer Krücke
doun s'en in die Heimat schicke.
Die Ruhebänk der Invalide
doun jetzt Bottler, Panther un Stebba hiente.
Die drei koschde unser Geld,
des is nimmäi schäi uff dere Welt.
Denn des Krankegeld is gut -
do faßt der Stebba neuen Mut :
E nei Auto werd kaaft - en Opel muß es soi,
was gibts net alles uff Krankeschoi !
Ehr Leit do unne sitzt'er un dut jetzt winke,
un wahrschoins noch e Bier'sche trinke.
Un die Musik speelt mit lautem Knall :
Kerle wie de Fauscht die gibts Überall.



DIE FESTAUSSCHUBKOMITEES

Die drei Ortsvereine mache die Kerwe jetzt,
un hewe a miteinander die Ausschüß besetzt.
Drum misse´se herzlichst Ausschüß gründe,
damit se fer jeden Peschdelschesjäger en Ausschußplatz finde.
Weil de Igge de Fihrrerschoi hot für Boote und Kutter
is er im Ausschuß für Fischweck und sonstiges Futter.
Soin Schwager Che´vum Finanzausschuß dut heile,
denn er muß den Profit jetzt teile.
Un do heilt noch oaner mit
vum TSV der **PANTHER** Pütt.
Auch der Hexer vum TSV kimmt in en Ausschuß noi,
er leitet den Ausschuß für Cognac un Woi.
Bei dene Oanere tagt der a mit, des macht er gut,
er kimmt kaum noch in die Schneiderbud.
On en neie Ausschuß misse mer uns erschd gewehne
es ist der Ausschuß für Hygiene.
Der Ausschuß kontrolliert, ob beim Henwesche jeder die Bakterien vernichtet,
nachdem er auf der Toilette die Notdurft verrichtet.
Es ist der Ausschuß Nummer vier
auch noch zuständig für Kondome und AB-Papier.
Fer de Vergnügungsausschuß hewe se sunschd koaner g´hood
wie de Kasper un de Schood.
Wer die Zwa net kennt, der det emol gucke,
die soche net feel, awer die kenne schlucke.
De Martin Monnheim wurde in den Ausschuß benannt
gegen Schußwaffen am Gutselstand.
Die Olde-Balze-Moo vun de Grine hot sich bei de Eva Maria beschwert,
daß sie doch ach in en Ausschuß g´hert.
Do hemer noch e Plätzel g´hatt
im Ausschuß für Löwenzahn und Endiviensalat.
Un wenn unsern Kerweumzug zu schnell werd soll sie des Tempo vermindern,
also mol sou g´sogt den Fortschritt verhindern.
Wenn mer uns uff die verlosse misste, wou bei uns werwe,
wär schun long nix mäi mit de Gras-Ellebecher Kerwe.
Der Sis leitet den Ausschuß für Werbung und Reklamen
in Ewigkeit Amen.

Mer wolle, daß die Maus jetzt speelt
un hoffe, daß koan Ausschuß feelt.

Neue Beschlüsse von der EWG;
Gewinne bei der Landwirtschaft passéé.
Hermann Mink hot korz geschaltet -
ich gei in Rente, Otto verwaltet.
Vum leedschde Zuschuß noch e nei Door
ich kehm mer jo schunscht dapisch vor.
Schließlich muß jo was passiern,
denn unsern Junge will noch e paar Joar studiern.
Doch die Voraussetzung, daß man ihn finanziert
is, daß er nicht mehr produziert.
Er stimmt dem zu mit einem Satz,
die Landwirtschaft betreibt er schwarz.
Jetzt stäit er om Door mit Spazierstecke un Schlappe
de Otto dut schaffe, de Staat muß berappe.
Fascht hot en es Unglick überkroche,
es hot uff omohl noch Feier geroche.
Die Feierwehr is glai gerennt,
beim Otto drin der Auszug brennt.
Des Feier war glai aus, der Schade net daier,
Es war'n beinoh meiner Leit wie Feier.
Der Einsatzleiter schreibt ins Protokoll -
Elektroleitung verrisse - mit Strom noch voll.
Doch noch jeder Einsatztour
macht mer om Fahrzeug Inventur.
Dabei hot mer festgestellt,
daß es graischte Strahlrohr fehlt.
Bei der Suchaktion sieht mer de Igge im Schulhouf sitze
un mit vollem Rohr in de Gemiseloude noi spritze.
Der Wehrführer peift den Igge zurück, der Brand is doch aus,
un übrigens, der war im Nochberhaus.
Do säigt de Igge dos des gar net soi kennt,
der Lade der het ehm schun lang unner de Nägel gebrennt.

Un die Musik speelt ver die Leit
won er net weg is, spritzt er noch heit.

STROOSEFESCHT

In Grasellboch is immer was los
e Feschd in de ganze Siegfriedstrooß.
Kegelclub's, Veroine un e Partei
war'n uff diesem Feschd debei.
Salzhering, Kuche, Pomm Frits, Gulasch mit Soß,
des Ougebot war riesengroß.
Was war im Schulhouf ver en Verkehr
Handkees on de AB-Deer.
Un newedrou zum Pissoir noi
dort gab es de Eppelwoi.
Es war jo koa Gschäft, mer konnt's fascht vergesse,
weil jo die Leit beim Scheiße net fresse.
Doch in dem Bereich gab's auch allerhand Spiele,
mim Balle dut mer uff die Torwend ziele;
in en Stamm do schlache se Nägel noi,
uff des Wort schlache fellet mer was oi.
Die Bauersch Gaby un Fr. Hintenlang
Waren auch auf dem Feschd zugang.
Un drowe beim Igge om französische Stand,
hewe se glai e Flasch Rotwoi zur Hand.
Beim Trinke gab's e mords Stick,
sie prahlten mit ihrem Liebesglick.
Ich braischt blous mim Finger zu schnippe,
kehmt doin Hannes det mich beglicke.
Die Margit macht long guði Mien zu beisem Speel,
doch der Satz, der war zuveel.
Sie saigt jetzt häb ich Grund
un schläigt re uff de Vogelmund.
De Saischnierersch Kal springt zwischenoi
will Schlichter dieses Streites soi.
Doch der dut sich ganz schei erre,
der ganze Kerl war voller Schlerre.

Un die Musik speelt: Ädäm war sauer
unser Gaby die werd a net schlauer

G A G G E S

Die Edith säigt zum Gagges: "Unsern Ruhesitz
is fehl zu kloa, des is doch en Witz!"

Um soi Fraa zu erheitern
will de Gagges jetzt erweitern.

Er hot sich's a schun vorgestellt,
de Platz wer do, blous fehlt es Geld.

Doch des ist fer den Bau koa Schlappe
die Olde solle hoalt mei berappe.

Doch do degeie führt die Behörde
eine Beschwerde.

Um deierer zu vermiete
misse sie mer biete.

Noch lengerem denke felit ehm was oi,
ich stell in den Teich e Pumpwäik noi.

Do spritzt es Wasser in die Hei;
owens mit Licht, ach is des schei.

Doch als die eines Tages nimmei dut,
stellt de Schmieds-Jäig fescht die is kaputt.

Der grouß Zuschlaghammer war frisch geschmiert,
domit hot er des Pumpwäik repariert.

Donoch war fer den Gagges gewiss,
daß der Bernd en Grobschmied is.

Denn wie des Pumpwäik, sou überholt, wia im Teich drin sitzt,
stellt er fescht, daß des noch unne spritzt.

Sou hot er seit dieser Zeit
en Whir-Pool fer die olde Leit.

Un vun de Behörde, diese schlaue
soche: "Jetzt derfe se baue".

De Gagges war gonz platt,
weil er des em Schmied's-Jäig zu verdonke hat.

Die Musik speelt gonz laut,
es is alles klar, jetzt werd gebaut.

D R A C U

E Wertschaft wie de Hagen muß flexibel soi,
manchmol is se voll, dann geit wiar koana noi.
Un da mer net sou fehl Arbeitskräfte beschäftige kann,
brauch mer bei Bedarf en Mann.
Un wer is donn auch ruck-zuck da
vum Iwweroi de Dracula
Schnitzel backe, Woi oischenke,
on die negschd' Bier-Bestellung denke;
wo es brennt is der zur Stelle -
kurzum: "Ein Mann für alle Fälle".
Der Ädäm saigt: "Waste, der Mann is stark,
der arbeit a in moim Freizeitpark".
Nach getaner Arbeit, Streß und schwitze,
derf er don am Stammtisch sitze.
Doch von Bier alleine lebt mer net,
mer brauch a mohl e Fraa im Bett.
Dann die Stammtischbrüder - guten Mutes
wollten für den Dracula was Gutes.
1000 Mark dut mer do sammle
un ver des Geld soll der dann rammle.
Zuerscht hot er am Leib gezittert,
doch dann hot er a Gschäft gewittert
500 Mark brauch ich. Schuß
weil isch erscht noch dusche muß.
Noch dem Dusche roch er ougenehm
oigschmert mit Nivea-Creme;
net weil ihm weiß so gut steht
sondern weil des besser flutsche det.
Der Gunter stand zu soim Wort, er wollt's ne weise
doch nur zu erhöhte Preise.
Den Vorschlag hot mer net ougenumme
drum is es net zum Abschuß kumme.

Die Musik speelt jetzt frei heraus
der hilft a bei de Gaby aus.

KLUNTHE

In Grasemboch woar oahner in aller Munde :
K l u n t h e

Als Wert von unsrer Sportlerklausur,
macht er dreimol die Woch do owwe e Sause.
Do verkaaft der Bier Worscht unn Äppelwoi,
doch sein beschde Kunne werd er selwert soi.
Unn wonn der HSV a noch gewunne hat,
dann ist der Mannes restlos satt
Im Winter woars,er is friehmoijens hoam,
de Schlüssel vergesse,unn schellt in soim Tran.
Soi Fraa macht uff,de Mannes macht noi,
im Kopp noch zuveel Eppelwoi.
Schmeißt hinner sisch die Deer ins Schloß,
läßt die Gabi im Nachthemd uff de Stroß.
Noch dere Attake sieht sie rot,
verweigert dem Mannes Tisch,Bett und Brot.
Der arme deifel,nackt un bloß,
sitzt jetzt einsam uff de Stroß !

(Spenden bitte auf das Konto 08/15 bei der Bez.SpK.Eppelwoi)

Als halber Italiener,wie kennts oannerscht soi,
ziegt er donn beim Josef oi.

Jetzt hagts den Mannes vollens um :

Tag und Nacht Delirium.

Des Autofahrn stellt er a net oi,
un rennt beim Hintenlang die Mauer oi.

Bei'em Konzert im Sportlerheim merkt er dann,
daß er sogar singen kann.

Des macht'em Spaß,er heert nimmäi uff,
als 'Elvis Press' tritt er laufend uff.

Doch mit dem Stimmbruch kam die Wende ,
die Karriere als Sänger scheint zu Ende.

Die Gabi säigt; heer uff mit denne Zicke,
kumm jetzt hoam,isch brauch dich zum Kartoffelschäile.


Ehr Musikante speelt,mer mache oahner druff,
es Sportlerheim bleibt trotzdem uff!



R o s i n e r (R a l f I g g e)


Bei uns is en junge Kerl im Ort,
der fährt gern mim Auto fort.
Mitte in der Nacht - zu später Stunde
dreht der Igge eine Runde.
Die Freundin will hoahm, es war ihr Wille,
der Buh, der fährt'se - mit 4 Promille !
Führerschein ist ihm egal,
er tritt nur auf's Gaspedal.
Doch in Mischelboch beim Lammer,
steht die Polizei - welch ein Jammer !
Die schwenke a glei Licht un Kell'
doch do schallt der Igge schnell :
Reißt den Kaisch rum in soinne Not
un sticht ab noch Hartenrot.
Mit Vollgas noch Affelboch - es gäiht ums Ganze
dort dut er iwver die Hauptstroß schanze.
Die Polizei hots schon in Kocherboch geleddert,
do häwwe donn die Stoßdämpfer nimmäi sou gut g'feddert.
Doch der Igge unverdrosse,
is in Richtung Olfe G-schosse.
Vum Alkohol noch ganz benumme,
is er dort vun de Stroß obkumme...
Jetzt fährt er medde doisch de Walt,
es dut en Schloag, es hot geknallt.
Die Reife warn platt, de Igge noch blau
der leeft jetzt hoam, un schläft uff em Bau.
Denn noi geht er net - des is jo gewiß
denn vor soim Olde hot er noch mäiner wie Schiß !
Aus diesem Grund is im Ort jetzt mäiner Ruh,
denn die Beiz 'Zum Stolle' is deshalb zu !

Ehr Musikante speelt - iwver Feld un Stobbl
de Igge ist Testfahrer bei Opel.




Firma Steinbeisser

Mit Sandsteinen, schön rot und schwer
kriegt die Fa. Hannes ledscht Malheur.
Uff dem Hänger ein Kamin,
renne se iwwer die Landstroß hin.
De Mella dut lenke, de Freddy dut reihern,
so doun se des Gefährts in die Pfalz niwwersteiern.
Uff halwer Streck ises donn passiert :
do hot der Kamin den Hänger entführt.
Doch Mondoags moijens - konnscht mache wos de witt,
kriee die Kerle jo souwos net mit !
Sie kumme zum Kunde - der glaubt es kaum,
haben die meine Sandsteine im Kofferraum ??
De Freddy wacht uff un säigt gonz verpennt ;
'Häm' mer den Weche dehoam iwwerhabt oaug 'hängt ?'
De Mella werd abwechselnd blaß un bloo
'Herrgott, awwel war des Ding doch noch doo !'
Doch der Kamin stäiht seit sellem Doag
in Bürstadt als Millverbrennungsouloag.
Blous ehr Leit, Ohns is gewiß :
daß des die erscht fahrbar Verbrennungouloag is.
Un die Musik speelt noch dere Leier,
die Ersatzlieferung war fer den Kunde donn doppelt sou deier !




MIX 50

Die Mineralölindustrie hod große Not
doch mit "Caramba" unn "Startpilot"
iwwerbriggd der Päider diese Krise
unn dud die Tanks jetzt voller gieße
Wie ers de Lissl erklärt brumms a schunn draus
mim Modorroad schdäid der Sis vorm Haus
Sou wie immer, im perfekte Modorroaddress
korze Hose, koan Helm, denn der Sis is im Stress
"Die Inge brauch ehr Weck, ich muß glai wia gai
tank voll unn mach mer die Migge vunn de Zäih"
Jetzt werd die Methode vumm Päider probiert
doch die Lissl hods noch ned Kapiert
Zwische Tank unn Lenkgestänge
dud se dann den Zapfhahn zwenge
Sie schdellt um uff Mix 50, es ergießt sich der Strahl
uff em Sis soi Bremspedal
"Winfried was hast'n da fürn Düng,
da gehn ja 30 Liter nün"
"Lissl, des gibts net, guck emol her
schunn 40 Liter raus unn moin Tank is noch leer"
Er guckt uff de Bode, verziegt koa Mien'
bis zu de Knöchel schdäid er im Benzin
Kratzt sich am Kopp, dann hod er gschliggt
unn ganz langsam die Zigarett in de Henn ausgedriggt
Der Päider kimmd raus unn säigt goanz smart
"Tscha Winfried, weiterhin GUTE FAHRT"
Unn die Musik schbeeld noch dere oalde Leier
50 Mark fa en leere Tank, des iss goanz schäi daier.




STOLLE

Die 'Helms - Disco' is jetzt zu,
der Schorsche-Lenz hot endlich Ruh !
Doch die Kerle, garnet dumm
gucke sich nooch wor Dannerem um.
Beim Igge unnerm neie Haus
baue se de Riewekeller aus.
Sie schaffe wie doll, verziehe koah Mien,
de gonze Doag leeft die Betongmischmaschien.
Des Material geht schnell zu Ende,
doch mim Gagges soim Bau kam dann die Wende !
Do sitzt jetzt unne in de Wies:
Binder, Zement, Käschde Bier un Kies.
Fuhr fer Fuhr werd do riwwerg'hollt,
mer braucht sich net wunnern, wonns beim Gagges nimmäi rollt !
Rohmeschenkel zäije uff zäije
düt der Dings vernonnersäije
unn als Deer zusammeneggle,
sunscht werd's drin zu kalt zum ...saufe.
On Sylverster weihe se de Stolle oi,
um fünfe setze se die Deer noch schnell noi
Doch kaum nimmt später Oahner die Klink in die Hän,
haachts die Deer mitsammt de Scharniern aus de Wän !
Äwwer mit un ohne Deer,
is do drin en mords Verkehr:
Do hogge se als , doun saufe un karde
un uff diverse Fraue warde.
Wie die erschde kumme wors a glei passiert,
do hot der Lauser zwo obg'fiehrt.
Äwwer bei sou Sache passt er immer uff :
Hot do de Staatsonwalt noch die Finger druff ?
Er läßt sich de Ausweis zeije un kriegt SchiB,
weil die Oah erschdt dreizehn is.
So bleibt ihm dann, statt denne Mädchen,
zu Hause nur das Fauste-Gretchen !
Unn die Musik speelt jetzt immer schlechter,
des is die mit denne fünf Tchter.




Beim G'sangverein - e mords Sauerei :
Is Oahner schon 27 Jahr debei,
mit drei Zentner un mit halwer Lunge
hot er ab un zu a g'sunge,
is bei de Ausflieg mitgewetzt,
hot beim Beerdigungssinge als e Trän rausgepetzt;
doch jetzt hot sich der Panther zu Recht beschwert-;
bei Allem debei - un noch net geehrt !
Dodebei hot er uff die Ehrung schon souleng gewardt,
fers Freibier en Haufe Geld g'schpaart,
doch des is immernoch im Sparstrumpf drin,
weil die Kerle vum Vorstand sou vergeßlich sin !



Der Kassewart, Herr Gerhard Schad
hot beim Engels neilisch g'haad,
guckt moijs in de Houf, kreischt 'Der Tag is versaut !
Hildegard, die häwwe mer es Auto geklaut !!!
Es half weder Polizei noch Interpol,
denn schuld war nur der Alkohol,
Des Auto stand noch on de Wertschaft, de Schlissel noch drin,
weil die Kerle vum Vorstand sou vergesslich sin !




A der Mink is vun der Vergesslichkeit getroffe,
un der war garantiert net vollg'soffe
denn vun Buttermilch un Kartoffelsalat,
kriegt mer koah Granat !
Un trotzdem hot Hermann v. Reichenbach (hochwohlgeboren)
beim Robbl drowwe Haih verlorn.
Un daß Haih uff de Stroß laigt gibt jo a blous Sinn,
weil die Kerle vum Vorstand sou vergeßlich sin!



Denn souwas kann jo blous passiern,
weil ers vergesse hot, es rischdisch zommezuschniern
Dehoam im Houf wacht er donn uff :
bei mer uff em Wache is jo fascht nix mäi druff !
Er rekonschtruiert un es fällt ihm wie oi ,
passiert muß des beim Robbl soi !
Er saust glei nuff - fängt ou zu douwe :
'Wou is moi Haih ? Ricks raus Du Glouwe !'
Der Robbl bleibt cool un säigt donn schäi :
'Wos soll isch mit doim Haih - moin Schoof frißt blous Kläih !'
Un die Musik speelt jetzt mit veel Witz :
De Schulz hots verspeelt, Freitags in de Spritz !



Anm., d. Red. Es war noch jemand vom Vorstand, der etwas vergessen hatte,
doch da der Kerwepfarrer auch dem Gesangsverein angehört,
hat der es auch vergessen.




H A G E N

Mädde im Saiwoase stäid e grouß Haus,
do guggle veel Kurgäschd zum Fenschder raus,
der Oah der is bucklich - der Oanner is krumm,
un der Wert der haaßt 'Schnawwel' un waas net warum !
Er hot e Hobby,ehr werds all kenne,
Mit soim Enkel dem Daniel macht er Dreiradrenne.
Doch donn werds Winter - es fengt ou zu schnaische,
unn sie doun sisch jetzt oft mim Bremsweg daische.
Zum Fahrn brauche se e freii Streck'
'Waaste Daniel,der Schnäi muß weg !'
Bei dem veele,grohe Schnäi,
mißts mim Lenz soim Bulldock gäi,
Doch glei mit de erschde Fuhr hot er Pech,
un rennt mim Schlepper in die Besch
Do stellt er den Traktor werre zum Lenz in die Scheier,
kaeft vum Goofy de VW-Bus,der is grouß un net deier.
Loade doisch die Schiebtür hot ewwer koan Zweck,
Prinz - mach mir den Aufbau weg !
Unn um des Fahrzeug zu iwwerfihrn,
doun se polizeibekannte Schilder montiern.
Glei bei de erschde Räumungstour,
kan ehne die Kripo auf die Spur:
Sie wolle'n verhafte,wolle'n glei mitnemme,
do fängt der Adam on zu schenne :
'Männer,macht doch koah dumm Zeig,
isch feh sowieso nur am Bürgersteig!'
Er schenkt'ne e Bier oi - die Polizischde wern weich
doch des war noch net der ledschde Streich,
Denn als der Schnee dann weggeschmolze,
rolle se glei de negschde Bolze,
Dunnersdoags hot der Adam als mords Malheur,
soi Milltonne sin'em veel zu schwer.
Er hot iwwerläigt un e Lösung g'funne :
Der Renno werd devorgebunne !
Fährt hinner Haus,moahnt er heet Ruh,
Doch die Handbrems woar net zu !
In de Wertschaft heertmer's wies draus Kracht :
Die Milltonn hot sich im Auto selbststännisch gemacht !
Unn die Musik speelt ganz ungeniert :
die Kaffemaschien is em a explodiert !



Sportverein

Em Sportverein is es desjohr passiert,
die häwwen glatt de Trainer entführt !
In Aschbach kam man zu dem Schluß,
daß sou en Mann zurückg'holtwern muß.
Freiwillig deet der Mogges des jo net mache,
doch die schaffe mit gemoine Sache :
Die Irene häwwe se sich vorgenomme - nur so kanns gelinge,
den Mogges zurück nooch Aschboch zu bringe.
Die Grasembäischer hot er sou gut trainiert,
do saift jeder en Kaschde Bier, ohne daß was passiert.
Beim Monnheimmer hogge se im Haisel drin,
saufe Orangesaft mit Gin;
denn will er hoam zu seinre Frau,
zum Autofahrn war er zu blau.
Das hat er aber nicht geglaubt,
do hätte s'em beinoh de Schoi geraubt.
Damit souwas nimmäi vorkumme kann
bleibt er jetzt in Aschboch als braver Ehemann.
Deshalb is es beim TSV passiert,
en neie Aschbäischer werd beim Sportverein engagiert.
Es is weiglich net sou leicht,
wenn mer die zwo Trainer vergleicht.
Der Dahne kann long un oigschnell laufe,
dodefer kann der Danner umsoumäi saufe.
Doch beide sin oig kloare Borsch,
der Mogges un der Bihne Schorsch !
Der Schorsch hot sich sogar vorgenomme,
daß die Fraue mit in die Spielersitzung kumme..
die olde Herrn häwwe die Wichtigkeit nicht erkannt,
häwwe die Fraue sougar vum Grillfescht verbannt !
Do werd der Inge die Sach zu doll,
'Wäscht eier Trikots selwert isch häb die Noas voll!!!'
Inge Schdäi holt jetzt emol uff,
un kumm zu uns uff die Bihn do ruff.
Fraa schenk glei noch Oaner oi,
bis die do is muß schnellnoch getrunke soi.
Inge Du bischt unser beschdi Seel,
uff em Sportplatz drowwe bei jedem Speel,
Inge mer brauche Disch iwwerall
bei uns bische un kleibschde immer om Ball !
Die AH waas garnet was on der alles hängt,
drum wersch Du heit vun u n s beschenkt !
Die Blumme solle Disch erfreun,
die sin vun uns - net vum Sportverein.
Un do, im Dahmer is Wäschpulver drin,
daß am Sunndoag die Trikots wie sauber sin..
Inge mer brauche Disch, des Waascht Du doch,
deshalb, die Inge sie lebe .. Hoch !
Un die Musik speelt jetzt mit Humor :
Ehr singt all mit un die Inge singt vor !



Andreas Richter - Quasi-Dings-mit

Im Iwwerroh, beim Digges links,
do wohnt de Dings.
E paar hunnert Meter weiter links,
do schafft de Dings.
Un eijentwou zwischedrin links,
do pussiert de Dings.
Vun dehoam zum Aweitsplatz is e weiti Strecke,
die fährt er moijens als mim Käfer um de Hawwem zu wecke.
Deswaije zieht der Wilhelm unners Dach,
do howwe bringt der mich sou schnell net wach !
Do Owwe heert'er frie koan Lärm, koah Maschien,
umm die Uhrzeit gibt er sich ganz der Liebe hin.
Owends kimmt er donn net nuff,
denn der Hagen hot jo uff.
Om negschde moijend is er immer gonz matt,
do is net blous am Auto de Reife platt.
Schaffe brauch er donn net, des is Gewiß,
weil donn schun wia Mittoag is.
Deswaije hot der Dings des Dings iwwernumme,
un is sou zu soim G'sellebrief kumme,
Un jetzt verzähl isch Eisch, moin lieber Mann,
was der Richter alles kann :
Baize, stemme, feile, ...
sich beim schaffe die Zeit verweile...
Bei der Firma Hawwem GmbH & Co KG,
fährt er a noch LKW !
Und das nicht nur zur Sommerszeit -
nein auch im Winter - wenn's glatt werd.
Eines moijens in der Friehe,
zieht es ihn nach Woahle hie,
doch in der Kurv on de Ellemihl,
war das Glatteis wohl zuviel,
schnurgerade und frontal,
rammt er den Laternenpfahl,
Die motorhaub is verdrickt :
'Moin lieber Monn - isch wer verrickt !'
Der Richter, der dut Kloache -
was werd do die Emma soeche ?? (werd se schloache ?)
Die Musik speelt noch dere Leier,
die Latern war gonzschäi deier !



N a c h t - b a d e n

An F K K hot in Grasemboch noch keaner gedacht,
do häwwe se noachts em Samer soi Schwimmbad gepacht.
Der Betrieb is zwar net offiziell,
doch rumgesproche hot sich's schnell.
Jeder will noi ins kühle naß,
un des fer nix - des war en Spaß !
Ohne Hemd un ohne Hose,
doun se donn im Schwimmbad roose,
Vor lauter Gejohle und vor Krach
werd es halwe Hotel wach !
A der Ernscht hot gemerkt was do passiert,
is nunner un hot die Klaader kassiert.
Ehr Leit do war die Hölle los,
sie renne doisch die Ortsstroß in de Unnerhos !
Die nei Stroß häwwe se sisch net nuffgetraut,
weil bei's Reibolds als Gahns aus em Fenschter schaut.
Un die Musik spielt ganz steil
Wen noch Klamotte fehle - er kriegt'se beim Keil.
(Buchackerweg 1)

